



1. maj 2020

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

### **Naalakkersuisunut apeqquq:**

- 1. §37\_365/2019, apeqquq. 9-imut akissumminni Naalakkersuisut allapput, "Meeqqat kigutaannik bøjililersuinissaq pillugu aningaasaqarnermik aallaaveqartumik itigartitsisoqarnikuunngilaq. Kigutileriffiup ataani kigutileritinneg meeqqanullu neqerooruteqartarnek kigutilerinermik suliallit naliliinerat tunngavigalugu pisarpoq."**
  - a. Naalakkersuisut uppersarsinnaavaat, 2019-ip ingerlanerani aalajangerneqarsimasoq meeqqat kigutaannik bøjililersuisarnek taakkuninngalu naleqqussaasarneq kigutileriffinni pisortat ingerlataanni unitsinneqarlunilu unitsikkiartuaarneqassasoq sulisussat amigaataanerit pissutigalugu?**
  - b. Suliassamik ilisimasallit amigaatigineqalernerat kigutit nakorsaannut pisortaanerup nammineerluni aqutissiuussimanerpaat kigutini narlorissaanermik suliallit suliassamut tassunga tunngasunik atorfissaqartitsinerup nalilersorneqartarneranut tamatumalu attatiinnarnissaanut quakkeerinnissinnaasut unitsinnerisigut?**
- 2. 15. Juli 2019 tusagassiuutinut nalunaarummi [https://naalakkersuisut.gl/kl-GL/Naalakkersuisut/Pisut/2019/07/1507 Tandregulering-boern](https://naalakkersuisut.gl/kl-GL/Naalakkersuisut/Pisut/2019/07/1507_Tandregulering-boern) allassimavoq meeqqanik kigutilerinermi bøjililersuinerit unitsinneqarnissaat Naalakkersuisut aalajangersimangikkaat, taamalu akuerisimangikkaat.**

**- Meeqqanik kigutilerinermi bøjililersuisarnek taakkuninngalu naleqqussaanerit unitsinneqarnissaat Peqqinnissaqarfimmi namminermi ilisimatitsissutigineqarsimappat, taava Naalakkersuisut tamanna pillugu aalajangernerat qanga piva?**
- 3. Kigutigissaaneq pillugu Namminersornerullutik Oqartussat nalunaarutaanni nr. 15, 13. September 2006-imeersumi ilaatigut §4-imi allaqqavoq meeqqat tamarmik atuartinneqartussaasut ukiui inorlugit ukiullit aamma atuartinneqartussaasut ukiullit akeqanngitsumik aalajangersimasumik akuttussusilimmik kigutileritinnissamut**

**pisinnaatitaaffeqarput. Aamma imm. 2-mi allassimavoq imm. 1 naapertorlugu kigutileritinnissamut ilaasut:**

**1) Nalinginnaasumik pitsaaliuineq, tassunga ilaalluni qaammarsaaneq.**

**2) Meeqqanut ataasiakkaanut piffissaliinerit aalajangersimasut naapertorlugit kigutit, qarngup alleqqullu ineriartornerannik qanorlu peqqitsiginerannik misissuinerit.**

**3) Meeqqat ataasiakkaat pitsaaliorfigneqarneri, taakkunungalu kiisalu angajoqqaanut qaammarsaaneq ilanngullugu.**

**4) Kigutini, qanermi alleqqunilu nappaatinik katsorsaaneq.**

**a. Kigutini narlorsaasaneq pillugu neqerooruteqartarnerup taamaatinneqarnissaa Naalackersuisut aalajangersimagunikku peqatigisaanik kigutigissaaneq pillugu Namminersornerullutik Oqartussat nalunaarutaat nr. 15, 13. September 2006-imeersoq Naalackersuisunit allanngortinneqarpa?**

**4. Ilumoorpa angajoqqaat, meeqqamik kigutaasa bøjlit atorlugit narlorissarneqarnissaannik kissaateqarlutik saaffiginnittut kigutilerisunut namminersortunut innersuunneqartarnerat, kigutileriffik namminersortoq illoqarfimmi allamiikkaluarpalluunniit?**

(Inatsisartuni ilaasortaq Sofia Geisler, Inuit Ataqatigiit)

#### **Tungavilersuut:**

Inatsisitigut najoqqutassat naapertorlugu "kigutigissaanerup siunertaraa angerlarsimaffimmi kigutigissarluartarnikkut, pitsaaliuinissamillu suliarititarnissamillu ataqatigiissumik neqerooruteqarnikkut inuit kigutigissarnikkut pissusissamisoortumik ileqqoqalernissaat, kiisalu peqqissunik kiguteqarnissaat, qaneqarnissaat aamma alleroqarnissaat ineriartortissallugit, taakkulu inuuneq naallugu atorneqarsinnaanissaat attatiinnarlugu."

Angajoqqaat illoqarfinniit assigiinngitsuneersut bøjlit iluaqutigalugit meeqqamik kigutaasa narlorsarneqarnissaat siunertaralugu kigutileriffinnut saaffiginnittut itigartitaasulli arlaliupput. Innersuunneqarsimappullu kigutileriffinnut namminersortunut. Angajoqqaat aamma ilisimatinneqarsimapput itigartitsinermut tungaviusoq Peqqinnissamut Aqutsisoqarfimmi aalajangerneq, tassalu innersuussutigineqarluni bøjlilersuinerimut taakkunungalu naleqqussaaneermut sulisussanik amigaateqarneq.

Manna tikillugu inuiaqatigiinnut nalunaarutigineqartoq tassaavoq 15. Juli 2019 Peqqissutsimut Naalakkesuisoqarfimmiit nalunaarut. Isumaqarpunga pingaaruteqarluinnartoq innuttaasut eqqortumik ilisimatinneqarnissaat, tassalu meeqqat kingutaasa narlorsarnissaannut bøjlilersuinersarit periarfissat – imaluunniit periarfissaajunnaartut – pillugit. Kigutit peqqissut inunnut tamanut pingaaruteqaaq, pingaartumik meeqqanut. Tamanna tunuliaqutaavoq Naalackersuisunut apeqqutigisannut qulaani allassimasunut.

Kissaatigivara apeqqutikka ullut suliffiusut qulit qaangiutinnginneranni akineqarnissaat.